

Cu hopi alegria di SVGA y Cas Sjabururi:

Prome piedra a wordo poni pa e cas nobo unda cada cliente lo haya su mes camber



ORANJESTAD (AAN) — Cablesante di Cas Sjabururi, sra. Omaira Leysner, tabata hopi contento cu pometimento di prome piedra pa e proyecto Cas Sjabururi, cu ta un cas pa personanan special, unda cada cliente ta bay haya su mesun camber. A tuma 14 aña largo pa e logro aki, sra. Leysner a comenta. Despues di diseña e proyecto a surgi algun inconveniente pero por fin, nan a keda cla.

E proyecto aki ta un necesidad pa mehora e calidad di bida di e habitantenan cu un bez cu e cas bin cla, ta bay haya cada un su mesun camber.

Cas Sjabururi no por tuma mas cliente. Nan tin subsidio pa un capacidad di 12 habitante, cu ta locual nan tin aworaki, y door di esey a dicidi pa mehora nan calidad di bida, dunando nan, nan mesun espacio unda e habitante ta bira mas independiente y ta haya su privacidad. E proyecto ta consisti di camber so, y un baño

cu nan tin cu comparti. Actualmente nan tin cuater camber pa cliente y acerca ta bin seis, y un di nan ta camber pa recreacion.

Sra. Omaira Leysner a menciona cu ainda no tin tur e fondonan pa e proyecto aki y nan ta sigui acudi na comunidad pa duna un man. Segun plan, Cas Sjabururi lo keda cla pa Maart 2020.

Sra. Eks Van Homelen, director di SVGA (Stichting voor Verstandelijk Gehandicapten Aruba), durante e ocasion aki tambe a muestra su satisfaccion cu e mainta bunita aki, y a gradici su personal y tur otro persona nan presencia.

El a duna di conoce cu e proyecto aki ta rekeri di un inversion di 560 mil florin. E stichting a recauda basta cen te aworaki, y e instancianan cu mas a yuda hopi ta CEDE Aruba, y sin su contribucion lo no por a yega na esaki. E dama a reitera cu e proyecto tin e meta di subi e calidad di bida di e personanan special, cu ta cliente

di e Institucion aki.

Tambe Samenwerkings Fonds di Hulanda, tambe un Supermercado grandi na Sasaki, cu su campaña di April ultimo a duna e donacion pa SVGA. E comunidad a haya chens pa duna su aporte durante e campaña aki. Ademas di donacionnan individual cu varios dama a haci y algun anonimo tambe. Tambe instancianan manera APA, SETAR, un banco comercial, dos compania di seguro, y ainda nan ta bezig cu un empresa local pa ayudo. Un hotel a haci nan e oferta cu ora e proyecto ta cla nan lo duna nan aporte den forma di material pa drecha e cambernan.

SVGA ta den deliberacion cu gobierno, pasobra tin hopi demanda y lo mester di hopi mas cas. Den e Crisis Social Plan tin planifica pa bin cu un facilidad pa mucha special cu no por keda nan cas. Fundacion Ambiente Feliz tambe ta bezig cu e Cas di Cuido na San Nicolas, pa wak si den e Crisis Social Plan aki por habri un di tres cas cu tin, cu awor ta bashi, cu tin lugar pa 20 habitante mas. E ta spera cu esaki bira un realidad tambe pasobra tin hopi necesidad y tin mayornan cu yiu special cu ta hopi preocupa y cu ta puntra na unda nan yiu ta bay ora e mayornan no tey mas. E stichting ta sigui lucha pa esaki, sra. van Homelen a acentua.